

Lebih 3,000 Anggota Kesatuan Sekerja Berhimpun Bersama Muhyiddin Selasa Depan
Bernama
17 Mei, 2012

KUALA LUMPUR, 17 Mei (Bernama) -- Lebih 3,000 anggota kesatuan sekerja seluruh negara akan bersama dengan Timbalan Perdana Menteri Tan Sri Muhyiddin Yassin dalam satu majlis perhimpunan di Pusat Konvensyen Antarabangsa Persada Johor, Johor Baharu Selasa depan.

Menurut kenyataan Kementerian Sumber Manusia Khamis, perhimpunan itu akan menyatukan anggota Kongres Kesatuan Sekerja Malaysia (MTUC), Kongres Kesatuan Pekerja-pekerja di dalam Perkhidmatan Awam (Cuepacs), kesatuan kebangsaan daripada sektor awam dan swasta serta kesatuan dalaman daripada sektor swasta, awam dan berkanun.

"Perhimpunan ini merupakan salah satu wadah pertemuan antara kesatuan sekerja dan pemimpin negara bagi membantu membina kefahaman kesatuan mengenai peranan kesatuan sekerja dalam proses transformasi negara.

"Perhimpunan ini juga mengharapkan kesatuan sekerja dapat memainkan peranan menjayakan matlamat kerajaan untuk mencapai status negara maju menjelang 2020," menurut kenyataan itu lagi.

Pada perhimpunan itu, Muhyiddin dijangka memperjelaskan dasar kerajaan kepada anggota kesatuan sekerja, selain menyediakan platform kepada pemimpin dan anggota kesatuan sekerja untuk menyuarakan pendapat, idea dan luahan hati mereka kepada kerajaan.

-- BERNAMA

Hak Cipta Terpelihara © 2012 BERNAMA

Source: <http://www.bernama.com/bernama/v6/bm/newsindex.php?id=666866>